

广佛丛书

妙法莲华经

(上册)

《广东佛教》编辑部印赠

妙法蓮華經

南無本師釋迦牟尼佛



保宁勇禅师示看经警策文

夫看经之法，后学须知，当净三业。若三业无亏，则百福俱集，三业者，『身』『口』『意』也。

(一) 端身正坐，如对圣容，则身业净也。

(二) 口无杂言，断诸嬉笑，则口业净也。

(三) 意不散乱，屏息万缘，则意业净也。

内心既寂，外境俱捐。方契悟于真源，庶研穷于法理。可谓水澄珠莹，云散月明。义海涌于胸襟，智岳凝于耳目。辄莫容易，实非小缘。心法双忘，自他俱利。若能如是，真报佛恩。

妙法莲华经弘传序

唐终南山释道宣述

妙法莲华经者，统诸佛降灵之本致也。蕴结大夏，出彼千龄。东传震旦，三百余载。西晋惠帝永康年中，长安青门，敦煌菩萨竺法护者，初翻此经，名正法华。东晋安帝隆安年中，后秦弘始，龟兹沙门鸠摩罗什，次翻此经，名妙法莲华。隋氏仁寿，大兴善寺，北天竺沙门阇那笈多，后所翻者，同名妙法。三经重沓，文旨互陈。时所宗尚，皆弘秦本。自余支品别偈，不无

其流。具如序历，故诉非述。夫以灵岳降灵，非大圣无由开化。适化所及，非昔缘无以导心。所以仙苑告成，机分小大之别。金河顾命，道殊半满之科。岂非教被乘时，无足核其高会。是知五千退席，为进增慢之俦。五百授记，俱崇密化之迹。所以放光现瑞，开发请之教源。出定扬德，畅佛慧之宏略。朽宅通人大之文轨，化城引昔缘之不坠。系珠明理性之常在，凿井显示悟之多方。词义宛然，喻陈惟远。自非大哀旷济，拔滞溺之沈流。一极悲心，拯昏迷之失性。自汉至

唐，六百余载，总历群籍，四千余轴。受持盛者，无出此经。将非机教相扣，并智胜之遗尘。闻而深敬，俱威王之余绩。辄于经首，序而综之。庶得早净六根，仰慈尊之嘉会。速成四德，趣乐土之玄猷。弘赞莫穷，永贻诸后云尔。

妙法莲华经品目

卷一……………一

序品第一……………一

方便品第二……………二六

卷二……………六二

譬喻品第三……………六二

信解品第四……………一〇二

卷三……………一二五

药草喻品第五……………一二五

授记品第六……………一三五

化城喻品第七	一四七
卷四	一八六
五百弟子受记品第八	一八六
授学无学人记品第九	二〇〇
法师品第十	二〇八
见宝塔品第十一	二二一
提婆达多品第十二	二三七
劝持品第十三	二四八
卷五	二五七
安乐行品第十四	二五七

从地涌出品第十五	二七六
如来寿量品第十六	二九四
分别功德品第十七	三〇六
卷六	三二五
随喜功德品第十八	三二五
法师功德品第十九	三三三
常不轻菩萨品第二十	三五三
如来神力品第二十一	三六二
嘱累品第二十二	三六九
药王菩萨本事品第二十三	三七一

卷七	三九〇
妙音菩萨品第二十四	三九〇
观世音菩萨普门品第二十五	四〇一
陀罗尼品第二十六	四一四
妙庄严王本事品第二十七	四二二
普贤菩萨劝发品第二十八	四三二

妙法莲华经卷第一

姚秦三藏法师鸠摩罗什奉诏译

妙法莲华经序品第一

开发正宗
之端绪也

如是我闻。一时，佛住王舍城耆闍崛山中，与大比丘众万二千人俱。皆是阿罗汉，诸漏已尽，无复烦恼，逮得己利，尽诸有结，心得自在。其名曰，阿若侨陈如，摩诃迦叶，优楼频螺迦叶，伽耶迦叶，那提迦叶，舍利弗，大目犍连，摩诃迦旃延，阿菟楼駄，劫宾那，侨梵波提，离婆多，毕陵伽婆蹉，薄拘罗，摩诃拘絺罗，难陀，孙陀

罗难陀，富楼那，弥多罗尼子，须菩提，阿难，罗睺罗，如是众所知识，大阿罗汉等。复有学无学二千人。摩诃波闍波提比丘尼，与眷属六千人俱。罗睺罗母，耶输陀罗比丘尼，亦与眷属俱。菩萨摩訶萨八万人，皆于阿耨多罗三藐三菩提不退转，皆得陀罗尼。乐说辩才，转不退转法轮。供养无量百千诸佛，于诸佛所，植众德本，常为诸佛之所称叹。以慈修身，善入佛慧。通达大智，到于彼岸。名称普闻无量世界，能度无数百千众生。其名曰，文殊师利菩萨，观世音菩萨，

得大势菩萨，常精进菩萨，不休息菩萨，宝掌菩萨，药王菩萨，勇施菩萨，宝月菩萨，月光菩萨，满月菩萨，大力菩萨，无量力菩萨，越三界菩萨，跋陀婆罗菩萨，弥勒菩萨，宝积菩萨，导师菩萨，如是等菩萨摩訶萨八万人俱。尔时释提桓因，与其眷属二万天子俱。复有明月天子，普香天子，宝光天子，四大天王，与其眷属万天子俱。自在天子，大自在天子，与其眷属三万天子俱。娑婆世界主，梵天王，尸弃大梵，光明大梵等，与其眷属万二千天子俱。有八龙王，难陀龙

王，跋难陀龙王，娑伽罗龙王，和修吉龙王，德
叉迦龙王，阿那婆达多龙王，摩那斯龙王，优钵
罗龙王等，各与若干百千眷属俱。有四紧那罗
王，法紧那罗王，妙法紧那罗王，大法紧那罗
王，持法紧那罗王，各与若干百千眷属俱。有四
乾闥婆王，乐乾闥婆王，乐音乾闥婆王，美乾闥
婆王，美音乾闥婆王，各与若干百千眷属俱。有
四阿修罗王，婆稚阿修罗王，佉罗骞驮阿修罗
王，毗摩质多罗阿修罗王，罗睺阿修罗王，各与
若干百千眷属俱。有四迦楼罗王，大威德迦楼罗

王，大身迦楼罗王，大满迦楼罗王，如意迦楼罗王，各与若干百千眷属俱。韦提希子，阿闍世王，与若干百千眷属俱。各礼佛足，退坐一面。尔时世尊，四众围绕，供养恭敬，尊重赞叹。为诸菩萨说大乘经，名无量义教菩萨法佛所护念。佛说此经已，结跏趺坐，入于无量义处三昧，身心不动。是时天雨曼陀罗华，摩诃曼陀罗华，曼殊沙华，摩诃曼殊沙华，而散佛上，及诸大众。普佛世界，六种震动。尔时会中，比丘，比丘尼，优婆塞，优婆夷，天龙，夜叉，乾闥婆，阿

修罗，迦楼罗，紧那罗，摩睺罗伽，人非人，及诸小王，转轮圣王，是诸大众，得未曾有，欢喜合掌，一心观佛。尔时佛放眉间白毫相光，照东方万八千世界，靡不周遍，下至阿鼻地狱，上至阿迦尼吒天。于此世界，尽见彼土六趣众生，又见彼土现在诸佛，及闻诸佛所说经法。并见彼诸比丘，比丘尼，优婆塞，优婆夷，诸修行得道者。复见诸菩萨摩訶萨，种种因缘，种种信解，种种相貌，行菩萨道。复见诸佛般涅槃者。复见诸佛般涅槃后，以佛舍利，起七宝塔。尔时弥勒